

Habitat, ni fallor, ad Wasam, et quidem rarissimum; nam descriptionem quam hic dedimus, est speciei haud antea cognitae, et unici individui, quod Nobil. D. Wasastjerna primus invenit et benignissime nobis describendum misit.

Savenius.

7. CLYTUS Pantherinus.

Rugosus niger, pube cinerascenti nebulosus; thorace lineis maculisque fucatis e pube ochracea; elytra veris maculis et arcu postico ochraceis.

DESCR. Maximus nostratum, et maximis individuis CALLIDIJ *bajuli* fere major vel cum mediocribus CALL. *rustici* comparandus. — *Caput* vix thoracis longitudine, parum deflexum, antice et postice ejusdem latitudinis, fronte valde declivi, scabroso-rugosum, carinis duabus lateralibus supra basin antennarum, ante oculos arcuatim ad angulum maxillarum inferiorem extensis, et in vallicula inter carinas eminentia deorsum arcuata in gremium excipiente lineam elevatam e vertice descendente, unde eminentia tricuspis in fronte; colore nigrum, pube crassa grisea ochraceaque adpersum imprimis dense in sulcis frontis; gula glabra, nitida; ore fuscescente: *Oculi* reniformes, parum prominuli, mortuorum fulvi, macula nigra, instar pupillae. *Antennae* thorace paulo longiores, nigrae, apice fuscescentes, pube densa cinerascenti vestitae. — *Thorax* postice fere directe et antice oblique truncatus, unde in medio supra latitudine longitudinis, at infra latitudine duplo latior, basi apiceque ejusdem latitudinis, vix marginatus, e rugis punctisque eminentibus

valde scaber, niger, pube crassa densiori cinerea adpersus, lineis utrinque longitudinalibus lateralibus, et maculis vel punctis duobus utrinque dorsalibus longitudinaliter positis apici prioribus distinctis, fucatis e pube densa ochracea, atque lineis itidem subtus utrinque abbreviatis ejusdem generis. — *Cervix* laevis nigra, impressione utrinque e pube ochracea tecta, ad quam utrobique macula fusca. — *Scutellum* breve, postice rotundatum, punctatum nigrum, pube crassa densa cinerea adpersum. — *Elytra* thorace medio paulo latiora, et latitudine haud triplo longiora, sed longitudine thoracis plus triplo longiora, linearia, ad apicem paulo angustata, summo apice oblique introrsum praemorsa; convexa, subtilissime punctato-rugosa, nigra, macula utrinque ad basin majori ochracea, et intermedia minori communi suturali, maculis porro duabus magnis ochraceis in medio, altera marginali, suturali altera, oblique positae, linea denique antrorsum arcuata prope apicem ochracea, cujus cornu superius secundum suturam ad apicem usque porrigitur; pube cinerascenti adpersa. — *Alae* fusco-hyalinae, nervis obscurioribus. — *Pectus* punctato-rugosum, nigrum, pube cinerascenti; maculae duae utrinque laterales e pube testacea. — *Abdomen* valde angustatum, punctato-rugosum, nigrum, pube densa cinerascenti vestitum. — *Pedes* mediocres, at quodvis pedum par longitudine antecedenti excellit, punctato-rugosi, nigri pube grisea adpersi; femoribus longitudine tibiaram sub-clavatis; articulus primus tarsorum posteriorum triplo longior eodem articulo primorum.

Habitat ad Ulaburgum rarissime: quos umquam vidi tantum duos, haud procul ab urbis portu, mense Septembri, in folio Alni concorditer insidentes reperi.

var. *b*: Macula elytrorum humerali et regione scutellari, summoque apice fuscis, atque loco lineae arcuatae maculae duae testaceae transversaliter positae propius apicem; pedibus etiam obscure fuscescentibus.

Habitat ibidem.

Savenius.

8. LEPTURA Jägeri.

Nigra tenue pubescens, thorace mutico; elytris praemorsis, antice, abdomine pedibusque rubris, tarsis nigricantibus.

DESCR. Statura et magnitudo LEPT. *melanurae*, feminae. — *Caput* nigrum, punctatum, clypeo et labro ferrugineis. *Antennae* totae nigrae.

Thorax niger convexus, crebre punctatus, latitudine longior, antice angustior, postice sinuatus, reflexo-marginatus, angulis prominulis acutis.

Scutellum parvum, nigrum.

Elytra thoracis basi multo latiora et plus quam triplo longiora, postice angustata, apice praemorsa, parum convexa, minus crebre punctata; nigra, antice quoad tertiam partem rubra, sutura tamen angustissime nigra, nigredine apicis in angulum ad suturam adscendente.

Thorax subtus et *pectus* nigra, pube brevi griseo-holosericea tecta. *Abdomen* rubrum, articulo primo basi et anali toto nigris.